

## **OBAVJEŠTENJE u vezi obaveze dostavljanja evidencije o kupcima na obrascu IKUL Upravi za indirektno oporezivanje**

Članom 33. stav (1) Zakona o akcizama u Bosni i Hercegovini („Službeni glasnik BiH“, broj 49/09) propisano je da se promet lož-ulja (ekstra lako i lako specijalno, EL i LS) može vršiti na benzinskim pumpama, u za to posebno predviđenom skladištu izdvojenom od mjesta predviđenog za snabdjevanje pogonskim gorivom motornih vozila i vozila na motorni pogon ili iz samostalnih posebnih skladišta ili direktnom isporukom potrošaču.

Prema članu 55. stav (1) Pravilnika o primjeni Zakona o akcizama u Bosni i Hercegovini („Službeni glasnik BiH“, broj 50/09, 80/11 i 48/12), pod skladištem ulja za loženje, u smislu člana 33. Zakona, podrazumjeva se prostor koji ispunjava uslove za obavljanje djelatnosti trgovine uljem za loženje utvrđen entitetskim propisima o trgovini, a prema odredbi stava (2) istog člana Pravilnika, odredba stava (1) ovog člana odnosi se i na benzinsku pumpnu stanicu kao maloprodajni objekat u kojem se promet na malo ulja za loženje EL i LS obavlja preko verifikovanih uređaja za istakanje.

Saglasno odredbi člana 57. stav (1) Pravilnika, poreski obveznici koji vrše prodaju ulja za loženje EL i LS iz samostalnih posebnih skladišta ili direktnom isporukom potrošaču – dostavom na adresu kupca, dužni su voditi evidenciju o kupcima koji vrše nabavku ulja za loženje. U stavu (2) istog člana Pravilnika bliže je propisan sadržaj evidencije o kupcima koji vrše nabavku ulja za loženje iz samostalnih posebnih skladišta ili direktnom isporukom potrošaču – dostavom na adresu kupca.

Stavom (3) istog člana Pravilnika propisano je da poreski obveznici koji vrše prodaju ulja za loženje EL i LS iz samostalnih posebnih skladišta ili direktnom isporukom potrošaču – dostavom na adresu kupca dužni su da do 10-tog u mjesecu za prethodni mjesec dostave UIO evidencije propisane ovim članom na obrascu IKUL (isporučene količine ulja za loženje) koji je sastavni dio ovog pravilnika i u svakom momentu, zbog kontrole, ovlaštenim licima UIO omogućiti nesmetan pristup tim evidencijama, s tim da se te evidencije moraju voditi i držati u skladištu.

Međutim, saglasno odredbi člana 57. stav (4) Pravilnika, propisano je da poreski obveznici koji promet ulja za loženje EL i LS obavljaju na benzinskim pumpnim stanicama preko verifikovanih uređaja za istakanje dužni su voditi evidenciju o prometu ulja za loženje u skladu sa entitetskim propisima, ali nisu u obavezi da te evidencije dostavljaju UIO na obrascu IKUL (isporučene količine ulja za loženje), kako to proizilazi iz stava (3) člana 57. Pravilnika.

**Prema tome, privredno društvo koje ima odobrenje od nadležnog entitetskog organa za promet ulja za loženje EL i LS na benzinskim pumpnim stanicama preko verifikovanih uređaja za istakanje, i koje je dužno da evidencije o kupcima vodi u skladu sa entitetskim propisima, nema obavezu da dostavi UIO na obrascu IKUL evidencije o tim kupcima.**